

專件

某君擬上山東撫帥暨衍聖公小啟

竊今泰西各國講求博物理化格致製造昔我周秦諸子張衡馬鈞諸人雖間引其端然專精致用實大有間必欲強爭爲中國所己有未免爲文人好勝之過然博物理化格致製造在泰西爲強國之具未必卽爲強國之本其所趨重者仍在教育哲學哲學之理與我自古聖賢儒者歷所發明反覆印証異者殆少至於教育之道我三代聖人之所設施及洙泗之間師弟講授實已抉剔無遺爲西儒歷傳所莫能外嘗考周禮學校之制於德育智育體育言之綦詳籌之甚備不勝縷數大戴禮保傅一篇並發明胎教之義孔門本身立教言習而不言性貴行而不貴知雅言詩書罕言性命以禮樂集大成其教育之精千古莫及後人讀書而不察義轉訛然於泰西教育家言是所謂家有藏金仰屋自歎轉艷心於鄰人之遺鏹也不亦值乎近者學堂大興競效歐美以云博物理化格致製造問途已經誠無上計然人求其本我求其具詎能及人今欲並探其本不掘藏金而問遺鏹其本果安在乎况舉世風氣所趨新學日進數十年後西學無慮不通若三代聖人遺教所傳雖爲萬世不可磨滅之理然當學術紛裂之際設非有人專意講求亦恐再傳失真後學將無階梯可以緣附國家歲糜數百萬金設學各省若聖門六藝雖定例彌專然非特設一齋俾樂之者群居講誦究慮用心而紛未能有所闡發東省爲聖人鄉里乃吾道之所發源苟歲得一二萬金不過海內學校費用千分之一二以之專開學舍講習遺經詩書六藝之傳於茲不絕且聖門禮樂並重今則除筮壺俗樂而外直無絃管之音果能由此講求於涵濡後學陶鎔氣質似可少得其實益大帥表率山左爲吾道千城上公篤守儒宗尤爲海內之所屬望倘如有意興舉名教倚之國粹倚之社稷人民亦並倚之較之區區下士負荷一身者其爲功難易大小蓋可知矣某目擊當世憂心未來雖嘗羨取歐珍而競競於保存國

粹之見歷時益切近與同人擬設近聖學舍一所專爲講法儒先以新舊學并擬規章招生開辦惟以微蟲之力欲障江河深知不逮用敢率呈胸臆以冀大力之維持尼山有靈實左右之擬章附呈伏乞採擇

公立學堂國文練習會啟并簡章

國文者科學之基礎也自學堂大開學者莫不浸灌於普通科學之實際而群受新教育學界之幸福矣惟我國文字實難往往有讀書十數年而文義不通者今則兼涉普通誠恐國文未嫻基礎不立而學堂之教科竟同虛設本堂教科本甚繁重而學生年齒又大小不齊故平日之與國文一科實注意焉現屆冬假之時仍恐日久荒廢既無以收博文之益而又無以激勸勉之心故本堂學董有鑒於此設立國文會隔數日一舉行以爲學生練習之地而名之曰國文練習會專力於講論文義淺者或遵許氏說文解字馬氏文通等講解字義以能聯綴及成段落爲的進於此者則作小論說以敘事論理爲的更進者則以發明義理叙論古今事實爲的凡學堂中人及並未入學堂者皆可報名投考並備有獎賞以資鼓勵俾學生有觀摩之益以增長其學問而起發其精神也我本國之文字亦庶幾其嫻熟乎哉 國文練習會章程 一本會以尊重國文爲宗旨 一本會由本堂學董總理一切餘如出題閱卷等事均由教員擔任 一本會設在高等司巷本堂內 一入會人之程度分爲三班 一特班作論 一甲班作小論 一乙班辨句小說 一入會之人不拘年歲惟報名時須指明何班親來本堂填寫報名書本會亦有分定班次之權 一本會集有巨資爲鼓勵之用各班優者均分別獎賞 特班十五人 甲班十五人 乙班十人 一第一次定於本十八日上午十二點鐘舉行即在本堂面試願入會者須前四日內每日九點鐘至十二點鐘來本會報名至舉行之前一日截止 一本會舉行後三日評定甲乙即行宣示至下午二點鐘由本堂學董到堂發給獎賞即將考卷宣示於衆 一入會之人無論何項學堂及並未入學者均可來本會報名

河南司道詳會議開辦河南官報章程文